

INFORME SANIDADE GALEGA

Dr. Xosé M^a Dios Diz



INFORME

SITUACIÓN DA SANIDADE GALEGA NO ANO 2016

Dr. Xosé M^a Dios Diz. Membro do Consello Asesor da FGS e Voceiro da Plataforma SOS Sanidade Pública de Compostela.

Santiago de Compostela, 8 de maio do 2017.

1.- Mantéñese a insuficiencia económica: O orzamento sanitario público baixou nun 18.3% desde 2009, sendo a Atención Primaria (AP) a máis perxudicada con un -22.3%, fronte a un -0.2% da hospitalaria.

2.- Falta de persoal: dende o inicio da crise, perdéronse 1.795 prazas na sanidade pública, 1.154 en AP e 641 nos hospitais: 513 prazas de médicos (392 en AP e 121 en hospitais), 184 prazas de enfermaría hospitalaria e 1.121 prazas de persoal non sanitario.

3.-Faltan camas: pese a eliminarse 447 camas hospitalarias públicas en Galicia, este verán do 2016, pecháronse máis de mil.

4.- Segue vixente o Real Decreto 16/2012 de exclusión sanitaria, que deixou sen dereito á asistencia sanitaria, a inmigrantes ilegais, mozos e mozas de máis de 26 anos que non se declaren pobres, ou que emigraron máis de tres meses fora do estado español. O “Programa Galego de Protección Social e da Saúde Pública”, feito por Feijoo, é un parche que non resolve a vulneración do dereito a universalidade da asistencia.

5.- Prosegue o desmantelamento e privatización dos servizos asistenciais:

- O modelo de Colaboración Público-Privada, para construír o Hospital Álvaro Cunqueiro de Vigo presenta innumerables deficiencias, como consecuencia da redución de máis de 400 camas con respecto o previsto inicialmente, supresión dequirófanos nun 31.4%, supresión de camas de UCI nun 25.5%, ou espazo de Urgencias nun 55.5%;, supresión en Radioloxía do 45%.
A Xunta licitou a ampliación e xestión privada do Hospital de Ourense (CHOU) favorecendo á empresa concesionaria –integrada por ACS, Indra e La Caixa-, en 41 millóns de euros.
A ampliación do Hospital do Salnés foi adxudicada á multinacional Cofely-Suez.
- Renovouse o Concerto Singular co Hospital privado Povisa de Vigo, que supón pagar un canon anual de 75 millóns de euros pola utilización de 403 camas, pese a ter menos recursos humanos e materiais que os Hospitais do SERGAS.
- Mantéñense os problemas nos Servizos de Hemodinámica, Radioterapia e Medicina Nuclear no Hospital de Lugo.
- Segue paralizado o proxecto de creación de Hospital Único de Pontevedra.
- Continua o desmantelamento de servizos dos Hospitais Comarcais e das súas áreas sanitarias.
- Soamente construíronse 6 dos 66 novos Centros de Atención Primaria previstos no Plan de Mellora da AP, eliminado de maneira fulminante cando o pp accedeu ó poder. Estaba asinado polo goberno bipartito, as centrais sindicais e as organizacións sanitarias.

- Mantéñense as Xerencias Integradas, que someten a Atención Primaria ás Xerencias Hospitalarias.
- Privatizouse o Laboratorio Central de Galicia, adxudicado á multinacional UNILABs, o que pon en perigo ós laboratorios dos Hospitais Públicos, que poderán pechar progresivamente como en Vigo.
- Mantense a empresa Galaria S.A. incumprindo o compromiso de integrar ós servizos de Radioterapia, de Medicina Nuclear/PET e a Resonancia Magnética na Sanidade Pública.
- Mantense o “Socio Tecnolóxico”, polo que, as mesmas empresas que fabrican os aparellos tecnolóxicos, controlan os equipos que deben adquirir os Hospitais, fixan o seu prezo e deciden onde se ubican.
- Os Institutos Biomédicos de Investigación dos Hospitais Públicos do Sergas (acollidos ao modelo empresarial, coa participación das multinacionais farmacéuticas) seguen controlando e dirixindo a investigación sanitaria, coa axuda da chamada Compra Pública Innovadora, que impulsa a innovación, financiando a investigación empresarial e a compra dos bens e servizos resultantes, que reserva os resultados da I+D financiada publicamente.... ás empresas privadas.
- Mantense a Lei de Racionalización do Sector Público que legalizou o patrocinio privado de todos os Servizos do SERGAS, mentres que “A Axencia de Docencia, Formación, Investigación, Innovación e Avaliación de Tecnoloxías e Servizos Sanitarios” e da “Axencia Galega de Sangue e Tecidos” mantén aos profesionais do sistema público, fora do control da docencia e da avaliación das tecnoloxías.
- Prosegue o deterioro da Saúde Mental, como consecuencia da paralización do Plan Estratéxico de Saúde Mental Galicia 2006-2011.
- Unicamente tres Hospitais Públicos ofertan a Interrupción Voluntaria do Embarazo, polo que a maioría das mulleres, ten que trasladarse a centros privados en Madrid, con risco para a súa saúde. Ningún dos 10 Centros de Planificación Familiar de Galicia, mantén unha atención integral e de calidade, debido os recortes de persoal e a potenciación da atención privada.
- Segue deteriorándose a Atención as Drogodependencias: pola redución das axudas, tanto a atención xurídica e penal das persoas en risco de exclusión social; da redución do financiamento dos Equipos de Prevención das drogo-dependencias; da redución dos convenios cas Comunidades Terapéuticas, e dos Centros de Atención a Drogodependentes e a redución de prestacións na Prevención do Alcoholismo.

6.- As listas de agarda, seguen elevadas e manténdose ocultas as non estruturais (deixáronse de publicar trimestralmente e só ofrecen datos dos dous últimos anos, para evitar comparacións).

7.- Manteñense privatizados os Servizos Estratéxicos do Sergas (en mans de empresas multinacionais e fondos de inversión):

- Servizo de ambulancias.
- Historia clínica electrónica (lanus): concedida a Indra (xestiona os datos sanitarios da poboación).
- Telecomunicacións, cedidas a Telefónica.
- A Plataforma Electrónica, cedida a Netaccede, fondo de capital risco por ex-altos cargos da Xunta e Caixanova, e xestionada por un directivo que provén da auditora Deloitte.
- O teléfono de cita previa, tamén en mans de Netaccede.
- O servizo de subministro e loxística, cedido a Severiano Servicio Móvil.
- O mantemento dos equipos sanitarios, adxudicado á Ibérica de Mantenimiento SA.
- A xestión da limpeza e enerxía entregada ao Grupo Norte.
- O servizo de catering dos Hospitais Públicos, adxudicado a Mediterránea-Arturo, do fondo de inversión Portobello (Banco de Santander, BBVA, CAM/Sabadell, Bankia) e de Arturo Fernández (vicepresidente da CEOE e imputado no caso Bankia).
- Os servizos de protección radiolóxica, cedidos a General Electric, empresa que fabrica os equipos é a que realiza o control de calidade.
- As contratacións públicas do Sergas. Transferidas a Plataforma Electrónica Vortal Connecting Bussines, participada por Microsoft, Telefónica e Indra, que xestionan tamén a teleasistencia, a receita electrónica e a historia clínica.
- As agullas de inxección de insulina dos pacientes diabéticos insulín dependentes. A mala calidade é culpa da empresa PROSAGA S.L.

8.- As Unidades de Xestión Clínica (UXC): ata o de agora detidas, pola presión dos colectivos sociais e sanitarios, e son o próximo, si o consiguen, para a privatización do Sistema Sanitario Público, co que pretenden converter os servizos de AP e Hospitalarios en “empresas autónomas”.

A enorme débeda sanitaria do goberno de Feijóo pon en risco a sanidade galega

Co plan de pago a provedores de Montoro, sáldase, no ano 2012, a práctica totalidade da enorme débeda sanitaria que as CCAA acumularan nos primeiros anos da crise económica, que só en tecnoloxía sanitaria e medicamentos hospitalarios, ascendía a 11.600 millóns de euros. A este plan non se suman o País Vasco nin Navarra, cunha débeda relativamente escasa (88 millóns e 25 millóns respectivamente), nin tampouco Galicia, **malia unha avultada débeda sanitaria de 458 Millónm de euros**, seguramente porque Feijóo quixo evitar o conseguinte control do Ministerio de Facenda sobre a Xunta.

De novo, as facturas das CCAA volven a acumularse, e requiren novos desembolsos estatais, debido a que as empresas sanitarias son “un pozo sen fondo”. Así, entre xaneiro e outubro de 2015 orixínase unha débeda que roza os 8.000 millóns de euros, a un ritmo mensual de 763.

Nese período, a Xunta acumula unha débeda sanitaria de 368 millóns de euros, aos que haberá que sumar os máis de 500 de débeda anterior e os compromisos anuais das súas innecesarias e desastrosas privatizacións (72 millóns/ano do canon do hospital de Vigo, 75 millóns/ano do concerto con Povisa e as custosas externalizacións de servizos sanitarios e non sanitarios).

A avultada débeda farmacéutica e tecnolóxica xerada en 2015 é especialmente preocupante, xa que reflicte o control da industria sobre as decisións do sistema sanitario.

A cesión da xestión da Investigación Pública do Sergas á industria farmacéutica e da **xestión da alta tecnoloxía** ás multinacionais tecnolóxicas, unido á **rápida e continuada aprobación de fármacos** a prezos cada vez máis estrambóticos para o mesmo proceso, incrementarán aínda máis a débeda sanitaria, o que levará a un círculo vicioso de novos recortes e privatizacións e á insostenibilidade do SNS.

Dende a Fundación Galiza Sempre, e dende a Plataforma SOS Sanidade Pública, observamos que cada día é máis evidente a necesidade dun cambio de rumbo na política sanitaria e por suposto, no goberno de Galicia.